

東鹿五志合集

興州胡永明

簽題



康熙保定府祁州東鹿縣志卷之七 人物志

忠節

劉崑曰燕趙古所稱慷慨悲歌之地若荊軻一流人真如寒風凜冽令人毛髮皆豎余之志忠節又如樓煩之於項羽目不敢視手不敢發地氣使然哉可敬也

唐

張興長七尺一飯斗米肉十斤悍趨善辯爲饒陽裨將祿山反攻饒陽興開陳禍福固衆心嬰城以守彌年滄趙陷史思明率賊搏城興擐甲持陌刀重五十斤與賊持一舉刀輒數人死賊皆氣懾城破思明縛之馬前謂曰將軍壯士能屈節當受高爵對曰昔嚴顏一巴將猶不降張飛我大郡將安能委身逆虜今日幸得死然願以一言爲誠思明曰云何興曰天子遇祿山如父子今乃反大丈夫不能爲國掃除反爲其下何哉思明曰將軍不觀天道耶吾上起兵二十萬直趨洛陽天下大定以偏師叩函谷守將西縛唐亡固矣興曰桀紂秦隋窮人力舉四海與爲怨故商周漢唐因得代之而有神器皇帝無違德祿山

非數帝賢是苟延歲月終即禽耳思明怒鋸解之且死罵曰吾能裒殲死兵敗賊衆軍中凜然爲改容

宋

董元亨累官國子博士判貝州王則據城叛元亨坐廳事賊排闥直入左右皆奔潰脇元亨索軍需元亨據案厲聲叱之張目罵賊遂被害事聞仁宗曰守法之臣也贈太常少卿勲爵

劉崑曰束鹿雖隸上谷然遠郎山近恒山遠易水近滹沱河山水雄奇篤生異人勲業爛焉雖然亦時也人固具有爲之才亦必遇得爲之時而後能有所建白余志勲爵深爲王公幸也

明王驥

封靖遠伯

束鹿舊志暨湛川子所著小冊人物自唐始余初志勲爵有漢耿況耿弇耿秉耿夔耿純數人採祁州志也及考後漢書耿況扶風茂陵人武帝時自鉅鹿徙焉與束鹿無涉且束

鹿之名唐天寶改置漢未有也祁州志曰自彥明徙居東鹿良馬鎮果何所攷噫誤矣因刪之只載靖遠伯一人存真也

靖遠伯傳

龔永吉

南京大
理寺卿

靖遠伯名驥字尙德姓王氏系出周靈王太子晉之後本太原人其先有宦遊雲中者因家宣寧曾祖守道皆業儒術有隱操祖思宗仕元爲保定高陽令惠愛在民久益見思父成篤厚周恤元季鼎沸徙家東鹿鳴琴鄉呂村里力農務本國朝洪武初遂占籍爲束鹿人里有鉅姓程子晉讀書敦義讓見其侃侃自礪器識不凡遂以女歸之公之母夫人也夫人勤於蠶織克樹家業生二子長卽公岐嶷警敏天資英特外祖父尤鍾愛之年十三遣入邑庠從典教陳九齡授書經日記千數百言九齡深所器重期以遠大尋居父喪葬祭盡禮家頗貧公乃勤耒耜具甘旨以養母母病躬持湯藥衣不解帶適太宗皇帝舉兵靖難里邑驚動而母卒倉皇畢葬事挈家僑居眞定永樂改元艱難來歸田廬蕩廢之餘經營補綴衣食稍給復卒業於庠舍明年遂領鄉薦登丙戌進士第奉勅賜歸爲鄉邦榮

未幾召拜兵科給事中獻替封駁卓然有聲奉命出鎮山西抑強扶弱發擿如神民有弗便事亟奏罷之徐溝鹽池以雨潦虧課二十餘萬追迫甚急民鬻子女不能償亟聞于朝蜀之民困頗蘇未幾奉命署應天府丞又署行在都察院事守法持正凜不可犯已而陞山西按察司副使時方營建北京公率軍夫九萬赴工撫循有方不致失所既還任清肅憲度剖決開敏獄無冤滯豪民王整殺男婦三人因無左驗獄久不決公乃微行廉得因姦殺死之實遂置整於法行部至陽城馬夫告曰去此不遠地名遊仙里里長張三因催糧太急闔家被火焚死今三年矣屍骨尚在窰中而事竟未雪公隨拘里長而語之曰前宿沁水分司夜夢見焦形燎髮老幼七八人告曰里長張三也爲糧戶所讐舉家被焚而死衆咸驚曰實某殺之也遂捕馬仕謙等十五人寘之於法又嘗按代州盜有玃官繪者戕人至死莫可踪跡公設方略獲盜二十餘人戮之自是盜賊屏息道路無虞上親征北虜者再公督運糧餉遠出塞外而下無所苦仁宗皇帝繼統改元洪熙遣監察御史吳實考覈山西官吏薦公堪爲按察使仁宗亦知公能召入爲順天府尹禁革奸弊惠鮮焚燬

威德並行畿甸稱治綸誥寵頒贈祖父皆如其職祖母母妻皆淑人宣德二年陞行在兵部右侍郎奉命同新建伯起調秦府護衛官軍七萬餘屯駐真定八月持節冊封楚府江夏王妃賜物一無所受又奉勅同都督王彧起調蜀府護衛官軍八萬留駐南京滿九載進擢本部尙書先是西虜阿台朶兒只伯素號桀黠屢犯邊甘涼上下被其侵擾時邊將失計徙各衛兵集甘州訓練賊覘各城兵少乘虛入寇屢肆剽掠人畜被擄道路梗澀正統二年朝議以公有文武才特命公至陝右整飭邊務許以便宜從事公從蘭縣渡河見迤邊城堡缺備烽堠不嚴又甘州屯兵頗冗且無紀律因嘆曰武備隳弛邊防如此而欲虜無侵凌難矣翌日大集兵衆于轅門詰問往年大軍遇虜于魚海而首先退縮以至沮衆無功者誰歟咸以都指揮安敬爲對考驗得實聲其退軍不忠之罪斬以徇衆曰自今遇敵有不奪勇前進者罪如之見者莫不股慄於是謹斥堠嚴部伍勤訓練利器器械積芻粟號令一新軍容整肅士氣增培非復往日之比矣旣而北虜把禿孛羅糾衆侵莊浪公遣都指揮魏榮等授之方略率兵以往一戰擒之俘其部落於是北虜始懼遣其僞殿中

知院阿魯等效欵於朝公以甘州總操官軍八萬冗濫不精虛費邊餉定數留之甘涼二州各二萬河西屬衛官軍二萬各回原衛操守腹裏衛分官軍二萬俾更班直於是兵得休息民減轉輸咸以爲便又度其要害之所選兵嚴守時加校閱虜知有備遂遠引去邊境以寧八月還京上親慰勞賜重幣羊酒有差虜聞公還復來犯邊是年十月公奉勅復至甘肅監督總兵官任禮等選練士馬務在殄滅北虜消彌邊釁申嚴號令明立賞罰軍聲大振士咸奮曰願得見虜一戰用收桑榆之功居無何虜果入邊公選精兵二千遣都督蔣貴將之臨行戒之曰兵精氣銳若遇虜不能勦殺無復相見貴父子感奮以往繼遣都督趙安率兵東由涼州逾白鴉狐口北抵赤林鐵門關爲犄角之勢公與內臣魯安都督任禮由鎮口循黑河至柳林堡忽報鹽池有警公自率精騎一千兼程追之蔣貴追虜遇於石城兒泉與戰遂擒阿台餘黨男婦駝馬無筭復以貴爲先鋒以降虜阿魯卜林爲鄉導公率馬步與蔣貴期以狼心山舉火爲號應援貴襲西虜阿台及朶兒只伯巢穴與任禮等縱兵夾攻于梧桐林擒其驍虜虎丹都等三十餘徒復進兵至野狐心青羊山葦

葦州界轉戰二千餘里俘虜男婦二千餘并馬駝畜產不可勝計殲戮幾盡遺胡虜數十人遠竄尋亦饑窘走死捷報于朝上遣中貴載金帛至甘州賞勞有差復命公以尙書兼大理寺卿二俸並支正統戊午十月班師還京再蒙賞賚先是雲南之麓川宣慰司宣慰使思任發譴亂久爲邊患遣將屢討輒不利正統六年二月上命定西伯蔣貴爲總兵率兵往討仍命公總督軍務陞辭賜兜牟細鎧弓矢蟒龍緋袍以寵其行夏五月至雲南適值久旱公齋沐遍禱諸神甘雨三日兵民忻忭六月賊寇大候州甚急衆謂瘴月不宜進兵公曰賊毒吾民可坐視乎遂命都指揮馬讓率大理諸衛兵六千赴援以郎中侯璉督軍與戰大破之斬首數百級獲其象馬甚衆未幾賊首刀放憂率衆五千合上江賊刀招漢欲犯金齒公諜知之潛遣兵伏險要至則斬之衆遽去是年冬至旣集金齒公乃與衆議曰今賊柵甚堅且險非衆力齊奮大舉未易平也乃議分兵三道以右叅將冉保將兵三萬自東入侯璉爲監督公督蔣貴等率師從中西入十一月五日俱會上江夾攻賊寨三日不下會天大風因縱火焚柵賊猶負固不屈公身先士卒冒矢石桴鼓督戰賊大潰

斬首五萬餘級餘衆奔沙木籠山據險爲連環七寨公揮兵攻其中寨諸將俱奮賊大敗斬首及投澗菁死者不可勝計十二月進至馬鞍山賊列象爲陣據壘相拒者尙十餘萬衆五日未決復因風縱火賊衆窘促投水火及死于鋒鏑者八萬餘人賊父子僅以身免遂盪平其巢穴於是振旅還雲南獻捷於朝奉勅獎勞召公北還凡徼外土官有以珍異來獻者悉拒不受先因金齒永平山箐有蒲蠻賊糾合諸種蠻潛伏險隘刼商旅絕運路人甚苦之公命勛衛陳儀提兵擒百餘輩梟首道傍賊遂滅跡行旅以通公過大理有巡檢妻張氏訴其夫爲土官馬沙所燭三年不能白其冤公一訊得情沙遂服辜又有蠻人韋郎羅稱廣新王聚衆造釁于維摩州官軍捕之未盡餘黨爲患未已上命公平賊後回兵勦之公遣指揮使萬城以土兵五百抵其境聲言王尙書大軍至矣賊衆聞之一時潰散爲首者計窮竄安南僞言借兵公令城傳檄安南守邊頭目黎注諭以禍福果斬賊首並妻子來獻又廣南府土官通判儂郎舉與富州土官知州沈政舉兵讐殺者十餘年黔國公率兵八萬征之弗克撫之不服上勅公設法撫勸公遣人喻政曰汝雖土官知州未

授于朝非僞官而何若果有改保汝應襲者來政稱病保其子沈善即授知州還蒞政父子感激之赴軍門請罪公慰遣之不煩一兵兩轡頓釋境內以寧公之處事應變多類此振旅還京師上遣戶部侍郎王質至臨清宴勞既入見上慰勞久之遣中貴人賜白金文綺楮幣羊酒于家封公爲靖遠伯歲食祿一千二百石子孫世襲指揮同知復賜金帛上親宴于奉天門設教坊樂以賞平南之功頒賜誥命鐵券加封推誠宣力武臣特進榮祿大夫柱國靖遠伯曾祖祖父皆加贈如其爵曾祖母祖母及配皆夫人時正統七年八月也居無何雲南報稱先逃賊首思任發莫知踪跡今爲緬甸所獲繫檣上召公入議且曰不免勞卿再一行耳公頓首請行仍命定西侯蔣貴爲總兵都督再保毛福壽爲叅將兼選往時降附夷虜官軍善弓馬者七百餘人以從復勅公兼兵部尙書總督軍務賞勞逾厚師行在道號令嚴明雖虜人之獷悍者亦帖帖奉約束經涉萬里秋毫無犯十月至金齒遣人諭芒市土酋放革曰汝先爲麓賊之黨罪惡貫盈今不速降兵屠爾城悔無及矣放革卽與其弟放奧詣軍門請罪於是賜之冠帶授以長官之職請給印符仍畀守其

柵疊蓋二人實賊子思機發之腹心腹心既破其他黨類亦皆相率降附若耳崖刀怕便南甸刀落硬線舊法茶山等二十餘寨酋長悉來送款公即遣千戶田貴往緬甸令促送思任發至軍前而緬人佯諾久不遣又云當送至地名貢章既而官軍有在緬者亦報緬有異謀公乃言於衆曰緬人黨蔽賊首而不亟送首鼠兩端延引時月意欲老吾之師若不示以國威大兵臨之不惟賊首未可得抑恐緬人有別圖也衆以爲然議諮僉都御史程富督運大理諸郡糧儲于金齒調四川湖廣貴州雲南兵俱至騰衝分爲五營與蔣貴及內臣少監蕭保分督三營兵至貢章總兵官沐昂侍郎侯璉叅將冉保毛福壽率東路兵由隴徑捕麓川蒐捕賊子以陳儀領前鋒三千開南牙山路至沙壩復兵蠻莫斷賊走路而與東路兵會諸虜之負固不服者遣人齎榜諭降有不即降者攻破平之而木邦宣慰罕蓋法同大頭目思外發等統虜兵萬餘營于蠻莫江潯觀我軍容之盛相顧駭愕伏帳下不敢出氣公因責以忠義賞之牛酒皆感悅退去先令人伐木造戰艦五十艘順流下金沙江艤於東岸既而緬人率兵大至其宣慰卜刺浪駐兵阿領而令其首領心苦提

以舟載思任發距貢章六十里止不進尋以小舟載之逸去乃使人來云若大軍能取孟養地方與我我當即送賊首至軍公曰緬人以詐誘我不待智者而識必潛與孟養伺我師過江將絕我歸路若墮其計中豈不殆哉苟不乘機追勦彼將遁去師老無功奈何乃招緬之沿江管軍頭目并腹心謀主大陶孟莽刺劄等七十餘人給以給賞至皆縛之密令蔣貴率師匝江而下焚其舟數百艘大戰一晝夜殺三千餘人而賊首先載去不可得東路之兵又克孟平諸寨而思機發亦潛竄不獲止俘其妻子及象馬甚衆捷聞勅召公與蔣貴班師次年六月四日入見上慰勞如前賜羊酒楮幣金酒器二白金百兩紵絲衣十襲加祿米三百石上親宴於奉天門其年九月上命公出巡三邊以防北虜仍許便宜行事公出塞外見地多肥饒而閒曠不理詢其故曰主將以邊禁不許耕種公即令開耕毋禁下人得其利甚喜又防邊士卒先是米布半支以給饋餉不免告饑公言於朝隨將糧餉米布兼支衆皆感悅自是由寧夏以達甘肅逾三千里衝冒風雪涉履嶮巇雖遐陬僻壤無不遍歷察其將校之尤無良者嚴治之至於城堡烽堠樓櫓器械凡防禦之不可

缺者悉俾繕治完固又頒釘牌之式于士卒教以捲舒之方以蹶虜之馬足又置火牛火箭可破敵陣而便施用者由是兵威大振邊塵無警三月還京上優加賞勞久之麓川二遺孽思機發思卜發復據孟養寨跳梁跋扈關於徼外譬之餓虎不墮陷罪未已也正統十三年春仍命公總督軍事以都督宮聚充總兵張帆田禮爲之副方英爲叅將調土漢番兵十三萬衆六月至其境公籌之曰孟養僻在金沙江西去麓川千餘里地多瘴毒至冬月稍可進兵乃先遣人造舢舨千餘艘以伺九月進兵至金齒冬抵貫屯公見金沙江山高水迅非舟楫所能濟乃令都指揮趙倫伐竹破篾絞爲二鉅纜先用二大筏於兩岸固結之而以舢舨承載於下其上鋪以木又以土平之即成浮梁亘千數百尺過兵運餉如履平地賊於西岸立棚二十里聚象馬以驅戰公麾兵悉渡一鼓破之乘勝連破其孟養等寨如疾風掃葉前無留行賊又于鬼哭山巔立三大寨乃授諸將成筭皆踴躍爭進公與張帆自攻蠻崖山左寨曰此寨破其餘不能守矣於是躬擐甲冑親冒矢石爲士卒先萬衆齊奮自卯至未三寨悉破斬獲不可勝計而二孽亦疑死於亂兵自是百蠻酋長

莫不震懾朝廷威德無遠不被而南徼自此得寧謐矣遂班師回雲南明年又值苗賊擾湖湘貴州四月回軍至赤水奉命就勦苗賊景泰改元正月宮聚以逗撓得罪授公平蠻將軍印提兵討殺苗賊生擒其首僞剗平王苗虫富等檻送京師其餘三百餘寨降附悉平公久在南裔身染瘴毒陳乞還京醫療朝命保定伯梁瑤代總其兵公回陞見增祿米一百石子孫世襲伯爵復賜羊酒重幣養子王祥特授錦衣衛指揮僉事時議以南京爲祖宗根本重地非才不足以鎮之乃命公往總督機務既至見京衛官屬多依權貴不守繩檢罰其魁數人因爲巨冊書各官廉污勤怠能否之跡明示勸懲衆始畏懼修省各思改過都市中有強梁奸詐之徒不畏公法肆爲不道人罹其患公立嚴法以繩之其害乃息景泰二年十月又蒙誥券褒嘉歲給祿米一千六百石時有逃軍二千餘名久不解遣多在京縣爲非公廉知其實遂摘發其弊又往年分調并寄居官軍一萬餘戶男子三萬九千九百皆倚權要不役軍官者三四十一年時當北虜未靖方募民丁爲守備計以此輩不經練習緩急無用公錄其名合選三分之一北戍朝議是之詔會議竟寢不行景泰三

年四月賜勅曰朕念卿以文武之才歷事朝廷已久賢勞累著簡在朕心今聞年逾八旬豈忍重煩以政宜加優待用答勛賢勅至解置總督機務食祿就閒娛老南京以延壽祉副朕眷待之至始得謝脫機務從容就閒次年乞歸祭掃先塋命給官舟北還陛見賜楮幣羊酒居北京舊第奉朝請俾養天年天順元年正月十七日聖駕復登寶位二月十二日召公至文華殿慰諭久之曰老臣惟爾與寧陽侯在耳賜金帛宴勞越數日上謂公曰爾尙精健可兼兵部尙書公辭至再上不允視事甫兩月武事振舉軍政修明三月六日奉命持節冊皇太子賜金幣五月又賜金繡綺縠蟒龍衣二襲六月八日公以年邁乞骸骨致休上憫而允之仍朔望朝謁八月賜誥封奉天翊衛推誠宣力守正文臣特進光祿大夫柱國靖遠伯子孫世襲又加祿米一百石十二月賜錦繡麒麟衣一襲是月公配張夫人卒上命遣官營葬許子勛衛珩指揮同知祥給驛護喪還東鹿繼遣保定府知府傅霖諭祭兼構宅一區於其鄉皆官爲繕治次年春又荷賜以寶帶白金且諭之曰卿精神未衰可日來朝陰雨則免乞歸省祖墓又賜楮幣五千貫既還仍朔望朝所以優待公者

始終如一眞明良相會之盛事也

論曰古所謂才兼文武號稱儒將者西漢以前姑置弗論東漢則有賈復寇恂祭遵盧植皇甫規張奐三國則有諸葛孔明周瑜魯肅陸抗而唐之李靖裴行儉蘇定方劉仁軌之倫莫非通經學古之士兼領將帥之任載之史冊不可誣者宋之韓琦范仲淹皆能出將入相文武并用建立殊績尤所謂傑然者也今公由名進士薦登華要敷歷中外者若干年文章政事卓然昭著人莫能及至於奉命行師則能出奇制勝應變敏捷是以北殄胡虜南靖百蠻銘功太常馳譽遐邇非具文武之全才識四夷之情狀者曷克臻此固所謂社稷之臣也宜乎聖朝褒封伯爵錫以金書鐵券之榮表以帶礪山河之誓畀世世子孫獲食天祿夫豈幸而至哉今聖天子優老重賢不煩以政賜資稠疊俾奉朝請公雖年邁八袞而神清氣和目明體健子孫玉立金紫滿門而公許國圖報之心至老益壯脫有委任尙克負荷實呂尙之倫也歟

劉崑曰天順日錄云麓川初叛時沐晟尙在若彼時只遣人宣布朝廷恩威赦其罪撫安

之足矣兵連禍結驥功之首罪之魁也余按思任發敗北之餘逃入緬甸屢勞王師大創之乃平豈宣諭之所能格者又云麓川不如中國一大縣得之無利不知國家當全盛之日留此小醜何以示外人尊一統正非僅利之所得言也嗟乎明之壞也莫甚於局外之空談與事後之督責烹懷間遂至事事掣肘國事日去每爲嘆息而不知英廟時已開其端歟惜哉